

# Powšitkowne WOZJEWJENJA

njedźelu, 19. awgusta 2018

## Ekumeniski nyšpor ze swjećenjom zelow

Ekumeniski nyšpor ze swjećenjom zelow budže njedźelu, 19. awgusta, w 14.30 hodź. w klóštrje Marijinej hwězdze. Na tamnišej zahrodze budžetaj jón cistercienski pater Johannes Müller a ewangelska fararka Claudia Wolf, wobaj z Kamjenca, swječić. Wopytowarjo móža zela sobu přinjesć a je woswječić dać. Po nyšporje zahraje kapala Horjany.

## Wosebite wodženje po Smochčanskim parku

„Štož stare štomy a rostliny powědaja“ rěka hesło, pod kotrymž přeprošuje Smochčanski Dom biskopa Bena njedźelu, 19. awgusta, na wosebite wodženje po tamnišim parku. Michaela Noack, krajinowa architektka z Drježdźan, je wuběrna znajerka Smochčanskeho hrodowego parka a wodženje nawjeduje. Zetkanje zajimcow je w 15 hodź. při studni na dworje. Po wodženju je składnosć, wo widžanym a słyšanym so rozmołwjeć abo při napoju na gitarowe zynki sluchać.

## Modlerski wječork wo duchowne powołanja

W Budyskim klóšterku wotměje so pjatk, 24. awgusta, modlerski wječork wo duchowne powołanja. Tutón zahaji so w 17.30 hodź. z Božej mšu. Po tym je modlerska hodžina před wustajenym Najswjećišim z načasnymi spěwami. Přizamknje so zhromadna wječor. Tónle modlerski wječork su młodostni z Wjelicina jako reakciju na lětuši póstny pastyrski list biskopa Heinricha Timmereversa nastorčili.

## Wotkryja taflu za Korlu Bohuwěra Šěcu

W Rachlowje pod Čornobohom wotkryja sobotu, 25. awgusta, w 14.00 hodź. pomnik w formje na skalisko připrawjeneje tafle. Z tym chcedža wjesnjenje serbskemu wučerjej, přirodospytnikej a spisowaćelej swoju česć wopokazać. Wotkryće pomnika je we wobłuku domizniskeho swjedženja předwidžane. Wotpowědnu ceremoniju z powšitkownym zazběhom swjedženja zahaja w Rachlowje na nawsy. Chór Budyšin a Bukečanscy dujerjo swjatočnosť hudźbnje wobrubja. Zajimcy su k tomu witani.

## Swójbne popołdnjo w Ralbicach

Wšitke swójby ze serbskich wosadow su cyle wutrobnje na zhromadne popołdnjo do Ralbic na farsku ležownosć přeprošene. Tute zahaji so njedźelu, 26. awgusta, w 14.30 hodź. ze swačinu. Po impulsowym referace wo formach nabožneho kubljanja džěci scěhuje rozmołwne koło k tutej temje. Džěci změja wšón čas składnosć molować, paslić abo hry hrać. Z nyšporom w 17.00 hodź. so zhromadne popołdnjo zakónči.

## Boža služba w telewiziji

W Kamjenicy woswjeća njedźelu, 26. awgusta, w 10 hodź. z ekumeniskej Božej službu jubilej 875lětneho wobstaća města. Ju swjeća mjez druhim Drježdźansko-Mišnjanski biskop Heinrich Timmerevers, ewangelski krajny biskop Carsten Rentzing a propst Clemens Hrjehor. Telewizija MDR Božu službu přenjese.

## **Wulět dekanatneje młodžiny z dwěmaj opcijomaj**

Młodostni ze serbskich wosadow wuleća sej njedźelu. 9. septembra, zhromadnje do Drježdźan. Bus wotjědže připołdnju. Dokładny časowy plan so hišće wozjewi. Dwě opciji stejitej jim k dispoziciji: Móža so při skakanju w superfly porjadnje wucychnować abo swoje mozy na tróšku hinaše wašnje w tak mjenowanym AdventureRoom trenować. Zeznaja tež „pisanu cyrkej“. W Jaseńcy přizamknje so spěwny wječor, wuhotowany wot Serbskeje murje. Přinošk wučinja 25 eurow na wosobu. Zajimcy měli so hač do njedźele, 26. awgusta, na e-mailowu adresu don.boskowy-dom@t-online.de přizjewić a zdobom podač, kotry z wobeju poskitkow bychu rady wužili. Na spěwny wječor su tež ći młodostni přeprošeni, kotřiž so na wulěće njewobdžěla.

## **Nyšpor z požohnowanjom konjacych zapřahow**

Towarstwo Cyrila a Metoda přeprošuje tež lětsa na wosebity nyšpor domchowanki z požohnowanjom konjacych zapřahow. Tutón budže njedźelu, 30. septembra, w 14.00 hodź. w Chróśćicach na łuce při Hatkach.

## **Běh wo pokal zbóžneho Alojsa**

W juniju wotprajeny běh wo pokal zbóžneho kapłana Alojsa wotměje so srjedu, 3. oktobra, w Radworju. Nadrobnosće k tomu so hišće wozjewja.

## **Zetkanje samostejacych w Smochćicach**

Samostejacy ze serbskich wosadow su na swoje přichodne zetkanje wutoru, 11. septembra, w 14 hodź. do Domu biskopa Bena w Smochćicach přeprošeni. Zajimcy njech so prošu hač do wutory, 4. septembra, w redakciji Katolskeho Posoła přizjewja, telefonowe čisło (0 35 91) 55 02 12. Štóz chce wotewzaty być, njech to prošu zdžěli. Wšitcy njech sej Wosadnik sobu přinjesu. Tež druhich na zetkanje rady powitaja.

## **Dny rozpominanja ze swjatym różowcom**

Modlerske zhromadženstwo swjateho różowca (Rosenkranz-Sühnekreuzzug) přewjedže wot pjatka do njedźele, 14. do 16. septembra, w Smochčanskim Domje biskopa Bena dny rozpominanja. Tute nawjedujetaj franciskanski pater Benno Mikocki a farar Stefan Thiel. Zajimcy měli so pola Rosenkranz-Sühnekreuzzug, Franziskanerplatz 4, A - 1010 Wien, telefonowe čisło (0043 1 ) 5 12 69 36 abo z mailku pod adresu zent@rsk-ma.at přizjewić.

## **Pytaja hladarja a kublarja zbrašenych**

Dom swjateho Jana w Smječkecach pyta wot 1. septembra sobudžělačerja z kwalifikaciju hladarja a kublarja zbrašenych (Heilerziehungspfleger) abo chorobnu sotru respektiwnje hladarja z wolu, wotpowědnu kwalifikaciju nachwatać. W Janskich kupjelach bydla duchownje zbrašeni ludžo, kotrychž tam zastaruja a spěchuja. Swoje pisomne požadanje njech pósćelu zajimcy prošu na adresu: CSW, Janska kupjel 1, 01920 Worklecy.

## **Mandźelski seminar**

Přizjewjenja za přihot na sakrament mandźelstwa wot pjatka do soboty, 30. nowembra do 1. decembra, w Smochćicach přijimuja pisomnje hač do srjedy, 7. nowembra, w Dekanatnym dušepastyrstwe we Worklecach. Formulary k tomu su w cyrkwjach wupołożene.